

嵩

書

嵩書卷之六

文林郎登封縣知縣傅梅元鼎撰

宦履篇

外方長曰山川有勝槩而冠蓋萃止固足樂也然當世則榮暢沒則已焉此亦山川之羞矣每觀古之君子宦轍所至後代侈為美談山頭片石名為墮淚即種秫八十日亦千載俎豆之何令人仰止若此哉嵩山介在汝洛之間非都會仕國可比賴考叔詭隨悟其君以封人見稱於左氏取節焉耳漢魏以來逾益

寥寥矣得非輦上君子實鮮韻人耶趙宋立宮祠以處退休之臣提舉管勾於崇福者先後絡繹大抵皆館閣名流此亦嵩山之一時也蓋朝廷以此羈縻搢紳搢紳者不得意亦往往乞就此官借巖谷優游以發紆其約結不平之氣亦未為不幸矣予次第其行蹟與綰綬臨民者並臚列成篇用以自鏡焉

周

穎考叔

穎考叔襄城人春秋時為鄭穎谷封人鄭莊公既克

弟段於鄆遷其母武姜於城潁而誓之曰不及黃泉無相見也考叔聞之有獻於公公賜之食食舍肉公問之對曰小人有母皆嘗小人之食矣未嘗君之羹請以遺之公曰爾有母遺繫我獨無考叔曰何謂也公語之故且告之悔考叔曰若掘地及泉隧而相見夫孰曰不然公從之遂為母子如初括地志云潁水縣東南三十里陽乾山今俗名潁山泉源出山之東谷其側有古人居處俗名為潁墟故老云是潁考叔之故居即酈道元注水經所謂潁谷也

漢

丁絃

丁絃字幼春潁川定陵人王莽末守潁陽尉世祖略地潁陽城守不下絃說其宰遂與俱降世祖大喜厚加賞勞以絃為偏將軍因從征伐絃將兵先度河移檄郡國攻營略地下河南陳留潁川二十一縣建武元年拜河南太守及封功臣帝令各言所樂諸將皆占豐邑美縣唯絃願封本鄉或謂絃曰人皆欲縣子獨求鄉何也絃曰昔孫叔敖勅其子受封必求堯堯之地今絃能薄功微得鄉亭厚矣帝從之封定陵新

鄉侯後徙封陵陽侯

朱寵

朱寵字仲威京兆杜陵人安帝中為潁川太守表孝  
悌儒義理寃獄撫孤老功曹主簿皆選明經有高行  
者每出行縣使文學祭酒佩經書前驅頓止亭傳輒  
復教授周旋阡陌勸課農桑吏安其政民愛其禮所  
至縣界父老迎者常數千人寵乃使三老御車問人  
得失百姓翕然治甚有聲延光二年嘗建嵩山啓母  
廟石闕勒銘其上後徵入為大鴻臚拜太尉順帝永

建四年以陰陽不和免寵立朝數抗直言雖為三公  
臥布被僅能覆身食脫粟米藜藿不厭子弟同衣而  
出并日而食將薨遺其子曰吾本寒賤諸生才非周  
幹橫受朝恩位過其任不能竭身報國負責深重身  
沒之後百僚所賻贈一無所受素棺殯殮疏布禪衣  
無設紼冕殮畢便以所有車牛載喪還鄉里勿告群  
僚以密靜為務

北朝

柳檜

柳檜字季華性剛簡任氣少文善騎射果於斷決年十八起家奉朝請尋除陽城郡丞大統間累遷持節撫軍大都督居三載徵還京師時兄蚪為祕書丞弟慶為尚書左丞檜曰兄則職典簡牘褒貶人倫弟則管轄群司股肱朝廷可謂榮寵矣然而四方未靜車書不一檜唯當蒙矢石履危難以報國恩耳尋從大將軍王雄討上津魏興平之即除鎮魏興華陽二郡會黃衆寶謀反圍檜連戰積十餘日城陷遂為賊所獲旣而賊衆圍梁州縛檜置城下令誘城中檜乃大



呼曰群賊烏合糧食已罄行即退散各宜勉之賊大怒遂殺之城中人皆為之流涕贈東梁州刺史

張乾雄

張乾雄武城人有才器秦孝王俊為秦州總管選為法曹參軍王嘗親案囚徒乾雄誤不持狀口對百餘人皆盡事情同輩莫不歎服後歷陽城令有政績

唐

陸餘慶

陸餘慶蘇州吳人陳右衛將軍珣之孫方雅有祖風

已冠名未顯兄玄表惜曰爾名宦不立柰何餘慶感  
激閉戶誦書三年以博學稱舉制策甲科累遷陽城  
尉武后封嵩以辦具勞擢監察御史以招慰蕃酋遷  
殿中侍御史鳳閣舍人尋降左司郎中餘慶於寒品  
晚進必悉力薦藉人有過輒面折退無一言開元初  
為河南河北宣撫使薦富春孫逖等名士數人尋遷  
大理卿終太子詹事謚曰莊雅善趙貞固盧藏用陳  
子昂杜審言宋之問畢構郭襲微司馬承禎釋懷一  
時號方外十友餘慶才不逮子昂而風流敏辨過之

生平以道自將雖仕不赫赫訖無悔尤

顧少連

顧少連字夷仲蘇州吳人舉進士擢上第以拔萃補  
登封主簿邑有虎孽民患之少連命塞陷甯獨移文  
嶽神虎不為害御史大夫于頔薦為監察御史德宗  
幸奉天徒步詣謁授水部員外郎翰林學士再遷中  
書舍人歷吏部侍郎時裴延齡方橫無敢忤者嘗與  
少連會田鎬第酒酣少連挺笏曰段秀實笏擊賊臣  
今吾笏將擊姦臣奮且前元友直在坐勸解之改京

兆尹尋遷吏部尚書封本縣男徙兵部為東都留守  
歷官多政績號良吏卒年六十二贈尚書右僕射謚  
曰敬

盧殷

盧殷范陽人元和中官登封縣尉能為詩自少至老  
詩可錄傳者凡千餘篇無書不讀然止用以資為詩  
與諫議大夫孟簡協律孟郊監察御史馮宿好期相  
推挽卒以病不能為官在登封盡寫其所為詩抵故  
宰相東都留守鄭公餘慶鄭公數以帛米周之書薦

宰相宰相不能用竟死於官將死自為書告友人河南令韓愈曰為我具棺並為銘其墓愈如其言遂葬嵩下

宋

范仲淹

范仲淹字希文蘇州吳縣人初舉進士為廣德軍司理參軍累遷大理寺丞秘閣校理尋通判河中府徙陳州時方建太一宮及洪福院市材木仲淹諫罷之召為右司諫歲大蝗旱乃命仲淹安撫江淮條上採

敝十事會郭皇后廢率諫官御史伏閣爭之諂出知睦州歲餘徙蘇州拜尚書禮部員外郎天章閣待制召還判國子監遷吏部員外郎權知開封府尋以與呂夷簡論事不合罷知饒州仲淹既去士大夫論薦不已歲餘又徙越州元昊反召為天章閣待制知永興軍改陝西都轉運使進龍圖閣直學士延州諸砦失守仲淹自請行遷戶部郎中兼知延州後因焚元昊書被言降本曹員外郎知耀州徙慶州遷左司郎中為環慶路經略安撫緣邊招討使以定川功進

樞密

直學士右諫議大夫復置陝西路安撫經略招討使以仲淹韓琦龐籍分領之仲淹為將號令明白賊不敢輒犯其境元昊請和召拜仲淹為樞密副使改參知政事仲淹在中書裁削倖濫考覈官吏日夜謀慮興致太平規摹闊大多所更張小人不悅浸謗毀之會邊陲有警於是以仲淹為河東陝西宣撫使自請罷政事廼以為資政殿學士陝西四路宣撫使知邠州其在中書所施為亦稍稍沮罷以疾請鄧州進給事中尋徙杭州再遷戶部侍郎徙青州會病甚請頽

州未至而卒年六十四贈兵部尚書謚文正仲淹少  
有志操自做秀才時便以天下為己任貴後身敦儉  
約而性好施予贍族樂義士多出其門雖里巷之人  
皆能道其姓字為政尚忠孝所至有恩邠慶之民與  
羗屬皆畫像立生祠事之嘗奉真宗御容崇福宮登  
高履勝與歐陽修梅聖俞有嵩山唱和詩十二章今  
傳於世

馬仲甫

馬仲甫字子山廬江人英宗時舉進士知登封縣轅



轅道險厄遂傭民鑿平為坦塗人便其行為刻石頌  
美通判趙州知台州為度支判官內侍楊永德上言  
漕舟淮汴間惟水遞鋪為便詔仲甫偕往訂可否還  
言其害十餘條議遂格出為夔路轉運使善政屢著  
遂繇戶部判官為發運使自淮陰徑泗上浮長進風  
波覆舟歲罹其患仲甫建議鑿洪澤渠六十里漕者  
便之拜天章閣待制知瀛州秦州古渭介青唐之南  
夏人在其北中通一徑小警則路絕仲甫得箕粟城  
故址自雞川砦築堡北抵南谷環數百里為內地詔

賜名甘谷堡故時羗人入城貿易皆僦邸仲甫設  
處之陽示禮厚實閑之也熙寧初守亳許揚三州  
察在京刑獄知通進銀臺司復為揚州提舉崇禧觀  
卒

韓維

韓維字持國以進士奏名禮部父億方輔政不肯試  
大廷受蔭入官父沒後閉門不仕以宰相薦召試學  
士院辭不就歐陽修薦為檢討知太常禮院尋以議  
陳執中謚不行乞罷禮院以祕閣校理通判涇州神

宗封淮陽郡王穎玉維為記室參軍王每事咨訪維皆悉心以對及穎玉為皇太子維兼右庶子神宗即位除龍圖閣直學士出知汝州召兼侍讀判太常寺熙寧二年遷翰林學士知開封府明年為御史中丞以兄絳在樞府力辭之王安石亦惡其直言復使為開封輦轂之下為之清肅俄兼侍讀學士充群牧使考試以言不用請郡遂出知襄州改許州復召為學士承旨天旱草求直言詔詞甚剴切詔出人情大悅是日乃雨王安石罷會絳入相加端明殿學士知河

陽復知許州帝幸舊邸進資政殿學士維請提舉嵩  
山崇福宮帝崩赴臨闕庭未幾宣仁后召兼侍讀加  
大學士拜門下侍郎踰年出知鄧州尋改汝州久之  
以太子少傅致仕轉少師紹聖中坐元祐黨降謫元  
符元年卒年八十二徽宗初悉追復舊官

司馬光

司馬光字君實夏縣人生七歲凜然如成人愛左氏  
春秋手不釋書至不知饑渴寒暑仁宗寶元初中進  
士甲科除奉禮郎簽書蘇州判官事改大理評事補

國子直講樞密副使龐籍辟通判并州時仁宗不豫  
國嗣未立天下寒心而莫敢言光繼范鎮言之後召  
直祕閣開封府推官尋同判尚書禮部未幾知諫院  
又上言選宗室爲繼嗣帝嘉納之遂立英宗爲皇子  
進光知制誥光固辭改天章閣待制兼侍講英宗即  
位進龍圖閣直學士神宗立擢翰林學士御史中丞  
以疏論張方平還翰林兼侍讀學士光在英宗時曾  
爲通志八卷以獻帝悅之命續其書至是賜名通鑑  
親製序面賜光令候書成日寫入後光與王安石論

新法不合求去乃以端明殿學士知永興軍宣撫使  
徙知許州趨入覲不赴請判西京御史臺及提舉崇  
福宮自是絕口不論朝政會求言詔下復陳六事元  
豐七年通鑑書成上之改資政殿學士降詔獎諭神  
宗崩光自洛入臨衛士望見以手加額曰此司馬相  
公也復為門下侍郎哲宗即位拜為尚書左僕射兼  
門下侍郎是年九月卒贈太師溫國公謚文正

呂誨

呂誨字獻可開封人性純厚家居力學不妄與人交

進士登第由屯田員外郎為殿中侍御史彈劾不避  
權要出知江州上疏請蚤建皇嗣名為侍御史改同  
知諫院數上章議濮王追崇事與執政不合遷工部  
員外郎知蘄州神宗立徙晉州加集賢殿修撰知河  
中府名為鹽鐵副使擢天章閣待制復知諫院拜御  
史中丞以論王安石庇章辟光故出知鄧州尋改知  
河南命未下而寢疾矣旋提舉崇福宮以疾表求致  
仕曰臣本無疾醫者用術乖方妄投湯劑率任情意  
遂之指下禍延四支一身之微固無足卹柰九族之

託何蓋以身疾論朝政也誨三居言責皆以彈奏大臣而去一時推其鯁直居病困猶以天下事爲憂旣革司馬光往省之至則目已瞑聞光哭蹙然而起張目強視曰天下事尚可爲君實勉之光曰更有以見屬乎曰無有遂卒年五十八海內聞者痛惜之元祐初贈通議大夫

程顥

程顥字伯淳河南人少時與弟頤聞周茂叔論學遂厭科舉之習而師事之舉進士調鄆上元主簿有異



政專任教化民愛之如父母熙寧初用呂公著薦為  
太子中允監察御史裏行神宗知其名數召見每退  
必曰頻求對欲常見卿一日從容咨訪報正午始  
趨出前後進說甚多大要以正心窒慾求賢育材為  
言務以誠意感悟主上嘗勸帝防未萌之欲及勿輕  
天下士帝俯躬曰當為卿戒之時王安石執政議更  
法令中外攻之甚力顥被旨赴中堂議事安石方怒  
言者厲色待之顥徐曰天下事非一家私議願平氣  
以聽安石為之媿屈安石既用事顥數論時政不合

居職八九月遂乞去言職安石出顥為提點西京刑  
獄顥固辭改命書鎮寧軍判官特遷太常丞知扶漢  
縣除判武學李定劾其新法之初首為異議又坐逸  
囚責監汝州鹽稅尋管勾崇福宮哲宗立復召為宗  
正丞未行而卒士大夫識與不識莫不哀傷焉文彥  
博題其墓稱為孟子之後一人嘉定十三年謚曰純

### 程頤

程頤字正叔顥之弟也年十八上書闕下欲天子黜  
世俗之論以王道為心遊太學胡瑗試以顏子所好

何學得頤文大驚異之即遜見處以學職呂希哲首  
以師禮事之治平元豐間大臣屢薦皆不起哲宗初  
司馬光呂公著疏其行詔以為西京國子監教授力  
辭尋召為祕書省校書郎既入見擢崇正殿說書即  
上疏陳輔養主德之道頤每進講色甚莊繼以諷諫  
聞帝在宮中盥而避蟻頤曰推此心以及四海帝王  
之要道也神宗喪未除冬至百官表賀頤言節序變  
遷時思方切乞改賀為慰既除喪有司請開樂置宴  
頤又言除喪而用吉禮尚當因事張樂今特設宴是

喜之也皆從之帝嘗以瘡疹不御通英累曰願  
相問安否且曰人主有疾大臣可不知乎翌日宰相  
以下始奏請問疾蘇軾不悅於頤頤門人賈易朱光  
庭不能平合攻軾胡宗愈顧臨詆頤不宜用孔文仲  
極論之遂出管勾西京崇福宮久之加直祕閣再上  
表辭董敦逸復撫其有怨望語去官紹聖中削籍竄  
涪州徽宗即位徙陝州俄復其官又奪於崇寧卒年  
七十五世稱爲伊川先生嘉定十三年賜諡曰正

楊時

楊時字中立南劍將樂人幼穎異能屬文稍長潛心經史熙寧九年中進士第調官不赴以師禮見程顥於潁昌相得甚歡其歸也顥目送之曰吾道南矣四年而顥死時又師程頤於洛時蓋年四十矣杜門不仕者十年後出爲荊州教授時未嘗求聞達而德望日重四方之士不遠千里從之游號曰龜山先生會有使高麗者國主問龜山安在使回以聞召爲秘書郎遷著作郎及面對奏時政之失徽宗首肯之除邇英殿說書聞金人入攻謂執政者當預爲守備已而

金人圍京城時建言請戮童貫等棄軍之罪疏上除  
右諫議大夫兼侍講又兼國子祭酒時備言當罷安  
石從祀闢其邪說疏上遂降安石從祀之列士之習  
王氏學取科第者已數十年不復知其非忽聞以爲  
邪說議論紛然諫官馮濟力主王氏上疏詆時會學  
官中有紛爭者有旨學官並罷時亦罷祭酒尋四上  
章乞罷諫省除給事中辭乞致仕除徽猷閣直學士  
提舉嵩山崇福宮已而告老以本官致仕卒年八十

三謚文靖

樓異

樓異四明人雅有文學性愛佳山水所至雖假館就舍亦聚石鑿池終日觀玩以爲常建中靖國初爲登封令甫下車即延見耆舊問民間所便苦次第興除暇則躬行阡陌勸課農桑純任德化民有爭訟者諭令私相和解不傳以爰書久之囹圄虛寂幾可羅雀官衙中芟廢圃築揖仙臺鑿芙蓉菡萏二池又命工人圖畫二室諸峰於仰嵩堂朝夕吟咏所著有二十四峰詩三十六峰賦至今傳誦焉

李綱

李綱字伯紀邵武人政和二年進士積官至侍御史改比部員外郎宣和初以言事謫監沙縣稅務遷太常少卿欽宗即位遷兵部侍郎金人圍京師綱力戰禦之數敗其兵會金使來宰相李邦彥語之曰用兵非朝廷意遂罷綱以謝金人太學諸生及軍民數十萬人詣闕上書乃召綱復為尚書右丞充京城四壁守禦使既而金師解圍北去綱陳備邊禦敵八事上之太原圍急以綱為河南河東路宣撫使以救既而



因事落職謫江寧金兵再至除資政殿大學士領開封府事高宗即位拜尚書右僕射兼中書侍郎陳時政十事帝悉行之未幾帝欲幸東南以避敵綱極言不可或謂綱曰外論洵洵咸謂東幸已決綱曰國之存亡於是焉分吾當以去就爭之尋以讒罷綱提舉洞霄宮紹興二年除觀文殿學士湖廣宣撫使兼知潭州諫官徐俯劉裴劾綱罷為提舉嵩山崇福宮四年金及偽齊來攻綱陳防禦之策詔付三省施行綱又條具六事疏奏上為賜詔褒諭除江西安撫制置

大使兼知洪州赴行在奏事再引對內殿陛辭陳用  
兵機務數千言後王倫使北還主和議綱與爭論之  
九年除知潭州荆湖南路安撫大使疏辭累奏遂允  
其請踰年薨贈少師

### 趙野

趙野開封人登政和二年進士第歷監察御史歷遷  
中書舍人給事中大司成拜刑部尚書翰林學士時  
蔡京王黼更秉政植黨相擠一進一退莫有能兩全  
者野處之皆得其心京黼亦待之不疑靖康初為門

下侍郎徽宗東幸詔野為行宮奉迎使以左司諫陳公輔言罷野行出為北道都總管顏政副之已而落職提舉嵩山崇福宮

李邴

李邴字漢老濟州任城縣人中崇寧五年進士第累官為起居舍人試中書舍人時北方用兵酬功第賞日數十百邴詞命無留難除給事中同修國史兼直學士院遷翰林學士嘗與禁中曲宴徽宗命賦詩高麗使入貢邴為館伴徽宗遣中使持示使者請傳錄

以歸未幾坐言者罷提舉南京鴻慶宮欽宗即位除  
徽猷閣待制知越州久之再落職提舉西京嵩山崇  
福宮高宗即位復徽猷閣待制歷官資政殿學士權  
知行臺三省樞密院事紹興間詔問宰執方略邴條  
上戰陣守備措畫綏懷各五事不報邴閒居十有七  
年薨於泉州年六十二謚文敏有草堂集一百卷

朱熹

朱熹字元晦婺源人紹興中進士初授同安主簿孝  
宗即位詔求直言熹上言封事隆興元年復召入對

極言君父之讐當復忤時相意除武學博士待次至  
乾道元年促就職既至而洪适為相復主和議不合  
歸屢為不起淳熙五年除知南康軍興利除害修復  
白鹿書院講明聖學旋以大早上疏極言朝政言多  
切直上讀之大怒熹以疾請祠不報後除浙江鹽茶  
公事又上疏言朝政上為動容嘉納始拜命按行境  
內風采肅然以論唐仲友事忤王淮遂歸時監察御  
史陳賈疏詆道學熹出奉宮祠者五年至周必大相  
除熹提點江西刑獄淮罷相遂入奏封事有要之於

路以爲正心誠意之論上所厭聞戒勿以爲言熹曰  
吾平生所學惟此四字豈可隱默欺君乎及奏上曰  
久不見卿浙東之事朕自知今當處卿清要不復以  
州縣爲煩也除兵部郎官以足疾辭除直寶文閣主  
管西京崇福宮未踰月再召又辭後歷官至煥章閣  
待制侍講以疏斥韓侂胄不報乞外詔以舊官提舉  
南京鴻慶宮慶元元年以疾再乞休致不許二年監  
察御史沈繼祖誣熹十罪詔落職罷祠五年准致仕  
明年卒年七十一謚曰文至理宗寶慶二年贈太師

追封徽國公

曹彥約

曹彥約字簡甫都昌人嘗從朱熹講學淳熙八年第  
進士歷仕州郡有聲嘗以蜀之邊面諸司並列兵權  
不一微有小警紛然奏議理財者歸怨於兵弱握兵  
者歸咎於財寡乃作病夫議獻之廟堂時論未以為  
然及蜀邊被兵內有張福莫簡之變彥約之言無一  
不驗遷大理少卿權戶部侍郎以寶謨閣待制知成  
都乞赴闕奏事不許改知潭州彥約力辭尋以煥章

閣待制提舉崇福宮理宗即位擢兵部侍郎兼國史  
修撰後授兵部尚書力辭不拜卒謚文簡

### 徐應龍

徐應龍字允叔淳熙二年進士調衡州法曹能平反  
寃獄薦改知高安縣呂祖儉言事忤韓侂胄謫死高  
安應龍為經紀其喪且為文誄之朱熹貽之書曰高  
安之政義風凜然後累遷至刑部尚書兼侍讀在經  
筵多指陳時政一日讀吳起為卒吮疽事應龍奏曰  
起恤士卒如此故能得其死力今軍將得以賄遷專



事掎克未免多怨上驚曰債帥之風今猶未除耶宰  
相史彌遠聞而惡之免侍讀未幾請老上不從徙吏  
部尚書以煥章閣學士提舉嵩山崇福宮卒贈開府  
儀同三司謚文肅

劉光祖

劉光祖字德修簡州陽安人登進士第除劔南東川  
節度推官歷遷右正言知果州以薦召入光宗立殿  
中侍御史闕宰臣薦光祖上曰是久在朕心矣光祖  
多所建白劾罷戶部尚書葉翥等徙太府少卿求去

不已除直秘閣改江西提刑又改夔州寧宗即位除  
侍御史改司農少卿入對獻謹始五箴又論人主六  
易六難上悚然嘉納進起居舍人論政令當出中書  
以陰折知閣門韓侂胄遷起居郎時朱熹被黜光祖  
再疏勸留之不聽尋為劉德秀所劾出為湖南運判  
不就及侂胄擅朝遂目為偽學禁錮之光祖撰涪州  
學記諫官張釜指為訕謗奪職侂胄誅召除右文殿  
修撰屢升顯謨閣直學士引年不許提舉嵩山崇福  
宮卒謚文節

許奕

許奕字成子簡州人慶元五年擢進士第一歷官起居舍人韓侂胄議開邊奕貽書論之所言切直侂胄不樂遣奕使金奕與骨肉死訣詣執政曰往集議時奕嘗謂增歲幣歸浮虜或可耳外此不可行者當死守之遂遷起居郎兼權給事中心往金人聞奕名久禮遇甚恭方清暑離宮相距二十里至是特為奕還內方射奕破的十有一乃卒行成還奏帝優勞久之奕復奏和不可恃宜葺紀綱練將卒使屈信進退之

權復歸於我客有以使事賀者奕憮然曰是豈得已  
者吾深為天下愧之權禮部侍郎條上六事俄兼侍  
講侍讀多所諷諫遷吏部侍郎與史彌遠不合補外  
以顯謨閣待制知瀘州改知遂寧府有惠政民畫像  
祠之進直學士知潼川府其民亦相與祠與東山僧  
舍會金人敗盟蜀道震擾奕請速選威望大臣宣撫  
其地言多切直御史劾之降一官詔提舉玉隆宮未  
數月特復原官提舉崇福宮尋以疾致仕卒贈通議  
大夫

崔與之

崔與之字正子廣州人少卓犖有奇節游太學舉進士授潯州司法參軍調淮西檢法官歷通判邕州守廣西提點刑獄所至有異政獎廉劾貪風采凜然召為金部員外郎時金人南遷於汴特授直寶謨閣主管淮東安撫司公事與之選將集兵浚濠築砦防邊甚固金人不敢深入久之召為秘書少監軍民遮道垂涕升秘書監兼太子侍講權工部侍郎未幾成都帥董君誼為叛卒所逐總領楊九鼎遇害蜀大擾與

之出知成都府本路安撫使至即帖然時安丙握蜀  
重兵久亦忌蜀帥之自東南來者至是獨推誠相與  
丙卒詔盡護四蜀之師開誠布公兼用吳蜀之士拊  
循將士人心悅服久之召爲禮部尚書不拜便道還  
廣蜀人思之肖其像於成都仙遊閣以配張詠趙林  
名三賢祠理宗即位授充顯謨閣直學士辭提舉西  
京崇福宮俄授廣東經略安撫使收服叛兵拜參知  
政事拜右丞相皆力辭至十有三疏乃得致仕薨時  
年八十有二謚清獻

倪思

倪思字正甫湖州歸安人中博學宏詞科授著作郎  
光宗立累遷中書舍人兼直學士院尋兼侍讀屢有  
建白上下稱善除禮部侍郎上久不過重華宮思疏  
十上言多痛切上為動容時李皇后寢預政思因進  
講極詞諫之未幾出知紹興府寧宗即位召除吏部  
侍郎被劾出守歷太平泉州建寧府久之召還試禮  
部侍郎兼直學士院韓侂胄以書招之不應逮入見  
首論朝政闕失語侵侂胄侂胄大怒思不為動後侂

胄誅除權兵部尚書兼侍讀求對極言樞臣史彌遠擅權覆轍可鑒彌遠上章自辨思求去上留之乞對言前日論樞臣獨班恐蹈往轍宗社堪再壞耶宜親擢臺諫以革權臣之弊等語彌遠懷恚思請去益力出知鎮江移福州彌遠拜相思被劾鐫職久之除寶文閣學士提舉嵩山崇福宮卒謚文節

### 王居安

王居安字資道黃巖人入太學舉進士授江西提刑司幹官入為太學博士首言人主當以知人安民為



要言甚切直遷校書郎以言被劾去起知興化軍召  
為秘書丞條論疆事明白時誅韓侂胄居安實贊其  
決屢遷右司諫首論列韓侂胄之罪並劾其黨陳自  
強等又上疏為呂祖儉呂祖泰稱寃天下快之又疏  
論趙彥逾為其黨所擠除目夜下遷起居郎兼崇政  
殿說書居安曰臣為陛下耳目官諫紙未乾乃以迂  
權要徙他職不得其言則去臣不復留矣尋奪一官  
罷太學諸生舉幡乞留之踰年復官知太平州再移  
隆興襄陽二鎮以言者罷嘉定十五年與魏了翁同

召遷工部侍郎時方受寶中朝皆動色相賀居安入  
對首言人主畏無難而不畏多難輿地寶玉之歸蓋  
思當時之所以失言極切至未幾出知溫州郡政大  
舉理宗即位以敷文閣待制知福州升龍圖閣直學  
士轉大中大夫提舉崇福宮卒贈少保有方巖集行  
於世

晁詠之

晁詠之字以道濟州鉅野人少有異才以蔭入官調  
揚州司法參軍未上時蘇軾守揚州兄補之倅州事

以其詩文獻軾軾曰有才如此獨不令我一識面邪  
乃具參軍禮入謁軾下堂挽而上顧坐客曰奇才也  
復舉進士又舉宏詞一時傳誦其文為河中教授元  
符末應詔上書論事罷官久之為京兆府司錄事秩  
滿提點嵩山崇福宮卒年五十二有文集五十卷

張耒

張耒字文潛楚州淮陰人幼穎異十三能為文十七  
作函關賦已傳人口游學於陳學官蘇轍愛之因得  
從軾游軾亦淡知之稱其文汪洋冲澹有一唱三歎

之聲弱冠第進士歷遷史館檢討居三館八年顧美  
自守泊如也擢起居舍人紹聖初請郡以直龍圖閣  
知潤州坐黨籍謫監黃州酒稅徽宗立起爲通判黃  
州知兗州召爲太常少卿甫數月復出知潁州汝州  
崇寧初復坐黨籍落職尋貶房州別駕未儀觀甚偉  
有雄才筆力絕健於騷詞尤長時二蘇及黃庭堅晁  
補之輩相繼歿未獨存士人就學者衆分日載酒殽  
飲食之誨人作文以理爲主作詩晚歲亦務平淡效  
白居易體而樂府效張籍久於投閑家益貧郡守翟

汝文欲為買公田謝不取晚主管崇福宮卒年六十  
一建炎初贈集英殿脩撰

元

鄭文卿

鄭文卿奉寧人至正中為登封令愛民養士首以息  
訟為心懸布科條諭民以禮義在邑數載政簡刑清  
遠近稱焉以秩滿得代百姓遮道送之為立去思碑  
於轅轅道上

大明

山錫之

山錫之蘇州人洪武六年任登封令時新逐胡元邑務經始錫之至初築衙宇及坊廂壇廟之屬煥然一新真心愛民為政專尚寬和惠養不務赫赫之名性好吟詠境內名勝所至留題雖不求精詣而一段瀟灑出塵之致可想也本朝令長以文學飾吏治者錫之實首倡焉

谷庸

谷庸陝西城固人永樂八年以太學生選為登封令

治狀赫然有聲時有禿尾虎白晝入城居民任守中  
姪被嚙死虎旋逸去衆逐之莫能得庸大以爲異即  
齋沐致禱焚牒中獄祠不旬日虎忽投守中廢圃井  
中以死喧傳遠近皆稱爲德政所致後卒於官邑人  
思之

### 侯泰

侯泰蘇州嘉定人嘉靖五年以鄉舉令登封政尚敦  
大留心於興革耻與俗吏爲伍邑在山中自國初以  
來制度多苟且未備泰甚病之拓泮宮增社學復高

陽書院建許由周公頴考叔二程諸祠經營有序民稱不擾分巡使者駐汝州故事邑中文移遞轉皆東南之禹州復折而西由郊縣迂回三百餘里機事多誤泰條議初置金店送表二郵修峻嶝坡之險遂為坦途至今便焉

### 丁應泰

丁應泰字元父武昌江夏人少年時修備有大志登萬曆十一年進士初授休寧知縣惠愛良善搏擊豪強十七年以治狀徵拜刑科給事中在掖垣僅一載



多所獻納尋以憂歸既出都有某御史者佐京察因隙肆讒降山西按察司照磨尋轉登封知縣應泰既左遷益精專吏事弗鄙夷其民於境內各坊保舉行鄉約之法妙選耆宿講解前言往行可為法戒者聚民聽之土風為之一變訟庭竟日不聞鞭笞之聲連歲有秋四方流徙者多願受屢應泰舉帑羨於四郭及各鄉起屋數百間分處之又買膏腴地三百畝為學田佐諸生膏火吉凶之費在邑踰二載二十五年陞兵部職方司主事士民肖像建生祠於東關二程

祠之左以事之未幾倭擾朝鮮

朝廷命將東征以應泰贇畫軍務既至海上於時局有所不平上疏糾論事連閣部大臣不勝而歸君子惜之

右宦履自袁周以及當代共三十五人除宋室奉祠二十人之外其以長民得書者千有餘年僅此十五人焉可謂嚴矣見聞既寡文獻無徵前哲之芳規何難湮沒幸有姓名雜見於斷石或治狀稍傳於殘簡者予已備載登封志矣茲書以嵩為主

視邑乘不無少略所以致詳於崇福宮者嵩故耳  
若高宗渡江之後嵩已辱於夷境聲教阻絕輪鞅  
不通而南宋諸君子猶有提舉管勾之號雖一時  
聊帶虛銜而名山賢人遙相引重又安得而遺之  
乎

門人

劉湛然  
袁嵩秀

校字

嵩書卷之六終

嵩書卷之七

文林郎登封縣知縣傅梅元鼎撰

巖棲篇

外方長曰自古稱高隱者必曰箕潁之節箕陰與陽  
城聖哲咸於此避曆數焉是皆嵩山之境也由茲以  
談嵩非逃世之區辭榮之藪哉觀其林壑盤紆煙霞  
蒸鬱衡泌之勝選無以尚茲矣周秦以後代有其人  
中古蒲輪璽書交賁於道遐想前軌固一時之勝也  
夫巖穴之士誠自砥其行匿耀潛輝良足重矣然真

隱者時至則行豈拘拘守一物哉孔子曰隱居以求其志邦有道則見邦無道則卷而懷之此亦足明隱者之所為矣若冥冥焉鳥獸同群枯槁不入城市於世道無所重輕是所謂石隱何足貴哉何足貴哉列古人出處弗詭於正者庶幾不致嵩山蒙譏也

周

王翊

王翊楚人隱居韜知嘗入雲夢山採藥得道顏如少童居陽城之鬼谷故稱鬼谷先生

徐廣云潁川陽城有鬼谷風俗通義

云鬼谷先生六國時縱橫家

蘇秦張儀師事之而習其學三年辭

去秦并相六國而儀亦入秦執政鬼谷子遺之書曰  
二足下功名赫赫但春華至秋不得久茂今二子好  
朝露之榮忽長久之功輕喬松之永延貴一旦之浮  
爵夫女愛不極席男歡不畢輪痛哉儀秦名顯諸侯  
而卒以見憎死鬼谷子遁跡不出學仙道處人間數  
百歲後不知所之

嵩山記云鬼谷於嵩山東南學仙

秦

孔鮒

孔鮒字子魚一名甲魏相子順之子也秦并六國名鮒為魯國文通君拜少傅始皇三十四年丞相斯議令燔書鮒懼遺典之滅亡也方來之無徵也遠令之禍烈也乃與其弟子襄歸藏書壁中隱居嵩山之陽無何陳涉起為楚王聘鮒為博士鮒以目疾辭退乃蒐輯仲尼而下子思及子上帛子高穿子順慎之言行列為六卷名孔叢子

漢

李膺

元禮字元禮潁川襄城人性簡亢無所交接唯以同郡荀淑陳寔為師友初舉孝廉為司徒胡廣所辟舉高第再遷青州刺史守令畏威明多望風棄官復徵歷漁陽蜀郡太守以母老乞不之官居綸氏教授常千人永壽間鮮卑寇雲中復徵為度遼將軍膺到皆望風懼服延熹二年再遷河南尹以表羊元群罪反坐輸作左校再遷復拜司隸校尉野王令張朔貪殘無道膺即殺之其兄讓為黃門訴寃於帝帝詔詰之膺以直對帝無復言自此諸黃門皆屏氣不敢出宮



省是時朝廷日亂綱紀頽弛膺獨持風裁以聲名自高士有被其容接者名為登龍門及遭黨事下膺於黃門北寺獄以大赦免歸鄉里居陽城山中天下士皆高尚其道而污穢朝廷頃之帝崩陳蕃為太傅引用天下名士乃以膺為長樂少府尋廢會張儉事起收捕鈞黨鄉人謂膺曰可去矣對曰事不辭難罪不逃刑臣之節也吾年已六十死生有命去將安之乃詣詔獄考死妻子徙邊門生故吏及其父兄並被禁錮景毅子顧為膺門徒以未有錄牒不與遣毅耻遂

自表免歸時人義之

陳寔

陳寔字仲弓潁川許人出於單微自為兒童雖在戲弄為等類所歸少為都亭刺史佐有志好學坐立誦讀縣令鄧邵試與語奇之聽受業太學後令復召為吏乃避隱陽城山中司空黃瓊辟選理劇補聞喜縣長旬月以暮喪去官復再遷除太丘長以沛相賦歛遠法乃解印綬去後逮捕黨人事連寔人多逃避寔曰吾不就獄衆無所持乃請囚遇赦得出寔在鄉閭

平心率物其有爭訟輒求判正曰寧為刑罰所加不  
為陳君所短嘗歲儉有盜夜入其室止於梁上寔陰  
見乃起自整拂呼命子孫正色訓之曰夫人不可不  
自勉不善之人未必本惡習以性成遂至於此梁上  
君子者是矣盜大驚自投於地稽顙歸罪寔徐譬之  
與絹二匹自是一縣無盜後黨禁始解大將軍何進  
司徒袁隗遣人敦寔欲特表以不次之位時三公每  
缺議者歸之累見徵命卒不起中平四年年八十四  
卒於家海內赴者三萬餘人制衰麻者以百數共刊

石立碑謚為文範先生

劉焉

劉焉字君郎江夏竟陵人魯恭王後也少任州郡以宗室拜郎中去官居陽城山精學教授舉賢良方正稍遷南陽太守宗正太常尋為監車使者領益州牧後徙居成都而卒

北朝

徐謩

徐謩字成伯丹陽人也家本東莞與兄文伯等皆善

醫藥蹇因至青州慕容白曜平東陽獲之送京師獻  
文欲驗其能置病人於幕中使蹇隔而脉之淡得病  
形兼知色候遂被寵遇為中散稍遷內侍長孝文遷  
洛除中散大夫轉侍御師蹇欲合金丹致延年法乃  
入居嵩高採營其物歷歲無所成遂罷高祖幸縣瓠  
有疾大漸乃馳驛召蹇診治有大驗九月車駕次於  
汝濱乃下詔曰夫神出無方形稟有礙憂喜乖適理  
必傷生朕以萬機興勞仲秋動痾心容頓竭氣體羸  
瘠侍御師右軍將軍徐成伯馳輪太室進療汝藩誠

術兩輸忠妙俱至乃令沈勞勝俞篤察克痊論勤語  
效得不重加陟賞乎宜順群望錫以山河準舊量今  
事合顯進可鴻臚卿金鄉縣開國伯食邑五百戶賜  
錢一萬貫絹二千匹穀二千斛奴婢十口馬十匹從  
行至鄴日夕左右明年高祖崩謇隨梓宮還洛謇常  
有藥餌及吞服道符年垂八十鬢髮不白力未多衰  
正始元年以老為光祿大夫加平北將軍卒延昌初  
贈安東將軍齊州刺史謚曰靖

裴粲

裴粲字文亮河東聞喜人景明初賜爵舒縣子沈重  
善風儀頗以矯豪為失歷正平恒農二郡太守嘗與  
高陽王雍有隙雍為州牧粲往脩謁雍含怒待之粲  
神情閑邁舉止抑揚雍目之不覺解頰及坐定謂粲  
曰相愛舉動可更為一行粲便下席為行從容而出  
後坐事免官世宗聞其善自標置欲觀其風度忽令  
傳詔就家急召之須臾使者相屬合室惶懼不測粲  
更恬然神色不變帝歎異之時僕射高肇以外戚之  
貴勢傾一時朝士見者咸望塵拜謁粲惟長揖而不

及還人責之粲曰何可自同凡俗又曾詣清河王懌  
下車始進便屬暴雨粲容步舒雅不以霑濡改度懌  
乃令人持蓋覆之歎謂左右曰何代無奇人世宗末  
除前將軍大中大夫揚州大中正遷安南將軍中書  
令後元顥入洛以粲為西兗州刺史尋為濮陽太守  
崔匡倫所逐棄州入嵩高山後復出為膠州刺史

### 裴衍

裴衍字文舒植與粲之弟也學識優於諸兄而才行  
亦過之事親以孝聞兼有將略仕齊至太守歸魏授



通直郎衍堅辭朝命上表請隱嵩高詔許之宣武末復出歷建興河內二郡太守加征虜將軍遭母憂解任衍歷二郡廉貞寡欲善撫百姓民吏追思之孝昌初荊州被圍衍大破解之除使持節散騎常侍平東將軍假安東將軍北道都督鎮鄴西之武城封安康縣開國子食邑三百戶已而相州刺史王鑒叛衍討平之除撫軍將軍相州刺史假鎮北將軍北道大都督進封臨安縣開國公增邑千二百戶復奉詔北討葛榮軍賊來拒戰衍軍敗見害朝野人情莫不駭惋

贈持節車騎大將軍司空相州刺史

馮亮

馮亮字雲通南陽人少博覽諸書性愛清靜篤好佛  
理後至洛隱居嵩山魏宣武嘗召以為羽林監領中  
書舍人將令侍講十地諸經固辭不許又欲使衣幘  
入見苦求以幅巾就朝遂不强逼還山數年與僧講  
誦為業蔬食飲水有終焉之志亮既雅愛山水又兼  
工思結架巖林甚得栖遊之適頗以此聞宣武給其  
工力令與沙門統僧暹河南尹甄深等同視嵩山形

勝之處遂造間居佛寺林泉旣奇營製又美曲盡山  
居之妙亮時至京師延昌二年冬遇疾還山居嵩高  
道場寺將終遺誡兄子綜殮以衣帛左手持板右手  
執孝經一卷置尸盤石上去人數里外積十餘日乃  
焚於山灰燼處起佛塔經藏數日卒適值驟雪窮山  
荒澗鳥獸饑窘僵尸野外無所防護禽蟲之迹交橫  
左右初無侵毀焚燎之日有素霧蒼鬱回繞其傍自  
地屬天彌朝不絕山中道俗營助者百餘人莫不異  
焉詔贈帛二百疋以供凶事

邢子才

邢子才名邵以字行河間鄭人十歲能屬文雅有才  
思聰明強記日誦萬餘言少在洛陽專以山水游宴  
爲娛飲謔倦方廣尋經史五行俱下一覽俱無所遺  
忘文章典麗旣贍且速年未二十名動衣冠釋巾奉  
朝請遷著作佐郎典朝儀每一文出京師爲之紙貴  
於時袁翻與祖瑩共嫉之子才恐爲所害乃辭疾出  
爲青州府司馬終日酣賞盡山泉之致永安初累遷  
中書侍郎及尔朱兆入洛京師擾亂子才與弘農楊

惜避地嵩高山普泰中兼給事黃門侍郎後歷官至太常卿兼中書監攝國子祭酒帶居三職並是文學之首當世榮之後授特進卒子才平生雖望實兼重不以才位傲物脫略簡易不修威儀天姿質素特安異同士無賢愚皆能顧接有書甚多而不甚讐校見人校書常笑曰何愚之甚天下書至死讀不可遍焉能始復校此且誤書思之更是一適李季節曰世間人多不聰明思誤書何由能得子才曰若思不能得便不勞讀書性好談賞不能閒獨公事歸休恒須賓

容自伴事寡嫂甚謹養孤子恕慈愛特深有集三十卷行於世

楊愔

楊愔字遵彥華陰人六歲學史書十一受詩易好左氏春秋幼喪母曾詣舅源子恭子恭與之歛問讀何書曰誦詩子恭曰誦至渭陽未邪愔便號泣感噎爲之罷酒居常恬裕謹慎季父暉從兄昱俱器重之及長能清言風神俊悟容止可觀正光中除羽林監永安初拜通直散騎侍郎以扈從車駕除通直散騎常

侍愔以世故未夷志在潛退乃謝病與友人中直侍郎河間邢邵隱於嵩山後齊神武復屢轉愔為大行臺右丞於時霸圖草創軍國務廣文繳敕命皆自愔出郭季素害其能因致書恐之仍勸其逃亡愔遂棄衣冠於水濱若自沈者變易名姓自稱劉士安復入嵩山後復出仕至驃騎大將軍封開封王沒贈司空

柳蚪

柳蚪字仲盤河東解人年十三便專精好學時貴游子弟就學者並車服華盛唯蚪不事容飾徧受五經

略通大義兼涉子史雅好屬文孝昌中舉秀才兗州  
刺史馮雋引為府主簿又為揚州中從事加鎮遠將  
軍非其好也棄官還洛陽屬天下喪亂乃退耕於陽  
城有終焉之志後被徵為行臺郎中與北府屬裴諏  
並掌文翰時人為之語曰北府裴諏南府柳蚪歷官  
二府司馬後因使入周周文帝留為丞相府記室論  
歸朝功封美陽縣男歷遷中書侍郎脩起居注仍領  
祕書丞事廢帝初遷祕書監加車騎大將軍儀同三  
司蚪脫略人間不事小節敝衣蔬食未嘗改操人或



譏之則曰衣不過適體食不過充饑孜孜營求徒勞  
思慮耳恭帝元年卒時年五十四贈兗州刺史謚曰  
孝

余朱敞

余朱敞字乾羅父彥伯旣誅敞小隨母養於宮中年  
十二敞自竇走至大街見童兒群戲敞解所着綺羅  
金翠服易衣而遁追騎至不識敞便執綺衣兒比究  
問知非會日已暮由是免遂入一村見長孫氏媪踞  
胡牀坐敞再拜求哀長孫氏愍之藏於複壁之中購

之愈急追且至長孫氏資而遣之遂詐為道士變姓名隱嵩高山略涉經史數年間人頗異之嘗獨坐巖石下泫然歎曰吾豈終此乎伍子胥獨何人也乃奔長安周文帝見而禮之拜行臺郎中靈壽縣伯保定中遷開府儀同三司進爵為公後為膠州刺史迎長孫氏至其第置於家厚資給之隋文帝受禪改封邊城郡公黔安蠻叛命敞討平之師旋拜金州總管政號嚴明吏人懼之後以年老乞骸骨賜二馬輅車歸河內卒於家

唐

田游巖

田游巖京兆三原人永徽時補太學生罷歸入太白山母及妻皆有方外志與共栖遲山水間自蜀歷荆楚愛夷陵青溪止廬其側長史李安期表其才召赴京師行及汝辭疾入箕山居許由祠傍自號由東鄰頻召不出高宗幸嵩山遣中書侍郎薛元超就問其母賜藥物絮帛帝親至其門游巖野服出拜儀止謹樸帝令左右扶止謂曰先生比佳否答曰臣所謂泉

石膏盲煙霞痼疾者帝曰朕得君何異漢獲四皓乎  
薛元超贊帝曰漢欲廢嫡立庶故四人者為出豈如  
陛下親降巖穴邪帝悅因敕游巖將家屬乘傳赴都  
拜崇文館學士帝營奉天宮游巖舊宅直宮左詔不  
聽毀天子自書榜其門曰隱士田游巖宅進太子洗  
馬尋放還山蠶衣耕食不交當世惟與韓法昭宋之  
問為方外友云

盧照鄰

盧照鄰字昇之范陽人十歲從曹憲王義方授蒼雅

調鄧王府典籤王愛重謂人曰此吾之相如調新都尉病去官居太白山得方士玄明膏餌之會父喪號嘔丹輒出由是疾益甚客東龍門山布衣藜藿裴瑾之常方質范履冰等時時供衣藥疾甚足攣一手又廢乃去具茨山下買園數十畝疏潁水周舍復豫爲墓偃臥其中病旣久與親屬訣自沈潁水

盧藏用

盧藏用字子潛范陽人能屬文舉進士不得調與兄徵明偕隱少室山學練氣爲辟穀長安中召授左拾

遺武后作興泰宮於萬安山藏用上疏諫止不從姚  
元崇持節靈武道奏爲管記還應縣令舉甲科爲濟  
陽令神龍中累擢中書舍人數糾駁僞官歷吏部黃  
門侍郎修文館學士坐親累降工部侍郎進尚書右  
丞附太平公主主誅乃流新州尋改驩州會交趾叛  
藏用有捍禦勞改昭州司戶參軍遷黔州長史判都  
督事卒於始興藏用善著龜九宮術工草隸大小篆  
八分善琴奕思精遠士貴其多能

武攸緒

武攸緒則天皇后之兄子也恬淡寡欲好易莊周書少變姓名賣卜長安市得錢輒委去後更授太子通事舍人累遷揚州大都督府長史鴻臚少卿后革命封安平郡王從封中嶽固辭官願隱居后疑其詐許之以觀所爲攸緒廬巖下如素遁者后遣其兄攸宜敦諭卒不起盤桓龍門少室間冬蔽茅椒夏居石室所賜金銀諸器物塵皆流積不御也市田潁陽使家奴雜作自混於民晚年肌肉消青瞳有紫光晝能見星中宗初降封巢國公以安車召拜太子賓客苦祈

還山詔可安樂公主出降又以璽書迎之既至帝勅  
有司即兩儀殿設位行問道禮詔見日山帔葛巾不  
名不拜攸緒至更冠帶仗入通事舍人贊就位攸緒  
趨就常班再拜帝愕然禮不及行朝廷歎息賜予無  
所受親貴來謁道寒溫外默無所言尋還山中書門  
下學士朝官五品以上並祖城東俄而諸帝誅武氏  
連禍唯攸緒不及睿宗下詔復拜太子賓客不就仍  
賜嵩山舊居令州縣存問開元十一年卒

王希夷



王希夷徐州滕人家貧父母喪為人牧羊取傭以葬  
隱嵩山師黃頤學養生四十年頤卒更居兗州徂徠  
與劉玄博友善喜讀周易老子餌松柏葉雜華年七  
十餘筋力柔強刺史盧齊卿就謁問政答曰已所不  
欲勿施於人此言足矣玄宗東巡狩詔州縣敦勸見  
行在時九十餘帝令張說訪以政事宦官扶入宮中  
與語甚悅拜國子博士聽還山勅州縣春秋致束帛  
酒肉仍賜絹百衣一稱

武平一

武平一名甌以字行潁川郡王載德子也博學通著  
秋工文辭武后時不與事隱嵩山屢詔不應中宗復  
位召爲起居舍人尋兼脩文館直學士時天子暗柔  
常后烝亂外戚盛強平一重斥語即自請抑母黨推  
遠時權以寓諷諫帝慰勉不許遷考功員外郎於時  
太平安樂公主各立黨相根毀親貴離闕帝患之欲  
令敦和以訪平一因上書請悉召近親貴人會宴內  
殿告以輯睦申以恩勤斥姦人塞讒路若猶未已則  
捨近圖遠抑慈示嚴惟陛下之命帝美其忠切卒不

能用後宴兩儀殿胡人襪子何懿等唱合生歌言淺穢平一上書言胡樂自備四夷外一皆罷遣况兩儀殿者陛下受朝聽訟之所大饗群臣不容以倡優媒狎虧污邦典帝不納玄宗立貶蘇州參軍徙金壇令開元末卒

李泌

李泌字長源京兆人七歲知爲文開元十六年以奇童召對帝大悅勅其家善視養之張九齡呼爲小友及長博學善治易常隱居嵩山之潁陽天寶中詣闕

獻復明堂九鼎議待詔翰林仍供奉東宮嘗賦詩譏  
楊國忠安祿山等因被斥肅宗即位靈武泌謁見陳  
天下所以成敗事帝悅將授以官固辭願以客從入  
議國事出陪輿輦衆指曰黃衣者聖人白衣者山人  
因賜金紫拜元帥廣平王行軍司馬泌佐帷幄多陳  
籌策愈見親信崔圓李輔國疾之泌畏禍願隱衡山  
有詔給三品祿賜隱士服為治室廬山中代宗立召  
至舍蓬萊殿書閣初泌無妻不肉食帝乃賜光福里  
第彊詔食肉為娶妻連被元載常袞所忌出外為刺

史德宗在奉天召赴行在授左散騎常侍貞元元年  
拜陝虢觀察使泌始鑿山開車道至三門以便饟漕  
以勞進檢校禮部尚書三年拜中書侍郎同平章事  
累封鄴侯俄加集賢殿崇文館大學士修國史固辭  
乃以學士知院事會日蝕東壁泌曰東壁圖書府大  
臣當有憂者吾以宰相兼學士當之矣明年果卒泌  
出入禁中事四帝柳玭稱兩京之復泌謀居多其功  
乃大於魯連范蠡云

蕭穎士

蕭穎士字茂挺鄱陽王七世孫四歲能屬文十歲補  
太學生觀書一覽即誦通百家譜系書籀學玄宗朝  
舉進士對策第一補秘書正字名播天下弟子受業  
者號蕭夫子召為集賢校理李林甫怒其不下已調  
廣陵參軍事穎士不能堪作伐櫻桃樹賦以譏林甫  
後召詣史館待制林甫方威福自擅穎士終不屈俄  
免官林甫死調河南府參軍事時安祿山寵恣穎士  
陰語柳并曰胡人負寵而驕亂不久矣東京其先陷  
乎即托疾遊太室山已而祿山反穎士往見河南採

訪使郭納言禦守計納不用歎曰肉食者以兒戲禦劇賊難矣哉因藏家書於箕潁間歷走諸鎮說之討賊遂客死河南門人共謚曰文元先生

盧鴻一

盧鴻一字顥然洛陽人博學善書籀結廬嵩山開元初備禮再徵不至五年召有司齎束帛徵之鴻一至東都謁見不拜宰相遣通事舍人問狀答曰禮者忠信所薄臣敢以忠信見帝召升內殿置酒拜諫議大夫固辭復下制許還山歲給米百斛絹五十府縣為

致其家朝廷得失具以狀聞將行賜隱居服官營草堂恩禮殊渥鴻一到山中廣學廬聚徒至五百人及卒帝賜萬錢鴻所居室自號寧極云所著有嵩嶽記一卷

石林草堂圖序云唐舊史鴻一蓋二名與中嶽劉真人碑所書合新史刪去一字不知何據當以舊史為正○王元美宛委餘篇云新唐書盧鴻當為鴻一見舊史與中嶽劉真人碑內所書同南齊張融云昔有鴻飛天首積遠難明越人為鬼楚人以為乙人自楚越鴻常一耳鴻一之名取此見困學紀聞亦可謂好奇矣

### 張彖

張彖陝州人力學有名志氣高大未嘗低折於人時



楊國忠權傾天下四方之士爭詣其門人有勸彖令  
修謁國忠可圖顯榮彖曰爾輩謂楊公之勢倚靠如  
太山以吾所見乃冰山也或皎日大明之際則此山  
當誤人爾後果如其言時人美其見幾後年及第釋  
褐授華陰尉時縣令太守俱非其人多行不法彖有  
吏道勤於政事每申舉一事則太守令尹抑而不從  
彖曰大丈夫有凌霄蓋世之志而拘於下位若立身  
於矮屋中使人擡頭不得遂拂衣長往歸遯於嵩山

李渤

李渤字濟之不樂仕進與仲兄涉偕隱廬山更徙少  
室元和初戶部侍郎李巽諫議大夫常況交章薦之  
詔為右拾遺渤上書謝不拜洛陽令韓愈遺書勸令  
應徵渤心善其言始出家東都每朝廷有關政輒附  
章列上元和九年討淮西上平賊三術又上禦戎新  
錄乃以著作郎召渤遂起歲餘遷右補闕以直忤旨  
下遷丹王府諮議參軍分司東都渤雖處外志存朝  
廷表疏凡四十五獻擢為庫部員外郎渤既數以峭  
直觸要臣意乃謝病歸穆宗立召拜考功員外郎渤

自宰相而下升黜之列名分品奏入不報以劾出為  
徐州刺史入為職方郎中進諫議大夫多所建白擢  
給事中賜金紫服以疏論中人獲罪出為桂管觀察  
使踰年以病歸洛太和中召拜太子賓客卒年五十  
九贈禮部尚書渤孤操自將不苟合於世人咸謂之  
沽激屢以言斥而悻直不少衰守節者尚之

### 孔述睿

孔述睿越州山陰人少與兄克符弟克讓俱以孝聞  
已孤偕隱嵩山而述睿尤嗜學大曆中劉晏常薦於

代宗以太常協律郎名累擢司勳員外郎史館修撰  
述睿每一遷即至朝謝俄而辭疾歸以為常德宗立  
拜諫議大夫命河南尹齋詔書束帛備禮敦遣既至  
對別殿賜第宅給廐馬兼皇太子侍讀固辭弗許乃  
改秘書少監兼右庶子復為史館脩撰重次地理志  
本末最詳性退讓未始忤物雖親朋燕集至嚴默終  
日人皆畏之與令狐峘同職峘數詆侮卒不校也時  
稱長者貞元間以疾乞解久乃許以太子賓客還鄉  
賜帛五十匹衣一襲特命給公驛卒年七十一賜工

部尚書

孟郊

孟郊字東野湖州武康人少隱嵩山性介少諧合韓愈一見為忘形交年五十得進士第調溧陽尉縣有投金瀨乎陸城林薄蒙翳下有積水郊間往坐水旁裴回賦詩而曹務多廢令白府以假尉代之分其半奉鄭餘慶為東都留守署水陸轉運判官餘慶鎮興元奏為參謀卒年六十四張籍謚曰貞曜先生郊為詩有理致最為愈所稱然思苦奇澀李觀亦論其詩

曰高處在古無上平處下顧二謝云

右唐得十三人又武什方中嶽山人武后時名爲  
諫議大夫郭仙舟嵩山處士玄宗徵爲諫議大夫  
不受二人行實無考錄名於此以俟異日

五代

鄭遨

鄭遨字雲叟以字行滑州白馬人少好學敏於文辭  
唐昭宗時舉進士不中見天下已亂有拂衣遠去之  
意欲携其妻子與俱隱其妻不從遨乃入少室山爲

道士其妻數以書勸遨還家遨得書輒投之火後聞其妻子卒一慟而止遨與李振故善振後事梁貴顯欲以祿遨遨不顧後振得罪南竄遨徒步千里往視之由是聞者益高其行其後遨聞華山有五粒松脂淪入地千歲化為藥能去三尸因徙居華陰欲求之與道士李道殷羅隱之友善世目以為三高士遨種田隱之賣藥以自給道殷有釣魚術鉤而不餌又能化石為金遨嘗驗其信然而不之求也節度使劉遂凝數以寶貨遺之遨一不受唐明宗時以左拾遺晉

高祖時以諫議大夫召之皆不起即賜號為逍遙先生天福四年卒年七十四遨好飲酒奕棋時為詩人多寫以縑素相贈遺以為寶至或圖寫其形翫於屋壁其見重於世如此

宋

孔承恭

孔承恭字光祖京兆萬年人占籍河南父莊為晉右諫議大夫承恭以廕入授秘書省正字歷溫安豐二縣主簿藝祖時王審琦節制壽春薦為鄭州錄事參



軍入爲大理寺丞尋以事放歸田里太宗即位復授  
舊官歷遷太常少卿又詔與左散騎常侍徐鉉刊正  
道書俄以疾求解官且言早遊嵩少間樂其風土願  
卜居焉上召見哀其羸瘠出御藥賜之授將作監致  
仕以子玠爲登封縣尉俾就祿養卒年六十二承恭  
少疎縱及長能折節自勵嘗上書陳治道上皆爲行  
之尤奉佛多蔬食所得奉祿太半以飯僧嘗勸上不  
殺人又請於征戰地修寺及普度僧尼人多言其迂  
闊云

舒元

舒元潁州沈丘人少儻好學與道士楊訥講習於嵩陽通左氏及公穀二傳與訥同詣河中謁李守貞與語奇之俱館於門下守貞謀起兵遣元與訥間道乞師江南守貞敗元與訥留江南元易姓朱事南唐李景屢有戰功歷遷官淮北南面招討使以讒代元憤怒歸周世宗以為檢校太保蔡州防禦使宋初從平李重歷官滑州巡檢使詔復姓舒氏開寶五年為白波兵馬都監太平興國二年卒年五十五贈武泰

軍節度使

舒知雄

舒知雄元之子初補殿直雷有終薦授供奉官郾延  
路駐泊都監後辭疾居嵩山兄知白嘗奏事太宗語  
及之即召出授西京作坊副使泉福都巡檢使真宗  
初懇請入道歸嵩陽舊隱復為王嗣宗李元則所薦  
授供備庫使歷知棣州麟府郾延鈐轄又知虔州復  
求入道面賜紫冠服號崇玄大師嘗獻字母圖有詔  
褒獎乾興元年卒年八十一

种放

种放字名逸洛陽人幼沈默好學父嘗令舉進士放辭之每往來嵩華間慨然有山林意未幾父卒數兄皆干進獨放與母俱隱終南山豹林谷以講習爲業從學者甚衆放別爲堂於峰頂盡日望雲危坐幅巾袒褐自稱退士著述甚多淳化初陝西轉運宏惟幹言其材行詔使召之其母恚甚放稱疾不起太宗嘉其節詔京兆賜以緡錢使養母不奪其志咸平元年母卒放哀毀廬墓詔賜錢帛粟米以助其喪四年兵

部尚書張齊賢薦於朝詔徵不至明年復召至京師以幅巾見帝命坐與語詢以民政邊事放曰明王之道愛民而已惟徐而化之餘皆謙讓不對即日授左司諫直昭文館表辭不許數日賜緋衣象簡犀帶銀魚第宅帷帳什物寵之踰年再乞還山命館閣官宴餞於瓊林苑帝親製詩送之放性喜幽僻終身不娶詔許嵩少養疾景德大中祥符間屢詔至闕下每有詢問皆據經以對頗多裨益屢拜官至工部侍郎尋復還山暮年乞徙居嵩山天封觀側帝因命內侍就

興唐觀基起第賜之及卒詔贈工部尚書

萬適

萬適字縱之陳州宛丘人自號遣玄子六七歲即為詩及長喜學問精於道德經與高冕韓佐交遊酬唱不求仕進隱居嵩陽專以著述為務有狂簡集等書數百卷行於世淳化中伍任翰林學士因召對上問曰卿早在嵩陽當時輩流頗有遺逸否伍以適及楊璞田誥為對上悉令召至闕下適既至特授慎縣主簿適素康強無疾詔下日已病猶勉強赴朝謝舉止

山野人皆笑之後數日卒

田誥

田誥歷城人隱居嵩山好著述聚學徒數百人舉進士至顯達者接踵以故聞名於朝宋惟翰許袞皆其弟子也誥著作百餘篇傳於世每構思必匿淡草中絕不聞人聲俄自草中躍出即一篇成矣淳化中以翰林學士韓伍薦詔令赴闕未至而卒

楊璞

楊璞字契玄鄭州新鄭人善歌詩士大夫多傳誦與

畢士安尤相善每乘牛往來郭店自稱東野遺民嘗  
杖策入嵩山窮絕處構思為歌詩凡數年得百餘篇  
淳化中以韓伾薦詔至闕下對於便殿不願仕進上  
賜以束帛與一子出身遣還故鄉乃作歸耕賦以見  
志真宗朝諸陵道出鄭州遣使以茶帛賜之卒年七  
十八

張昇

張昇字杲卿韓城人舉進士為楚丘主簿王曾稱其  
有公輔器累官度支員外郎夏竦經略陝西薦其才



改涇原秦鳳安撫都監以母老求歸故官改京西轉運使知鄧州尋歸養歷戶部判官開封府推官至知襍御史昇性質樸彈劾激切不識忌諱以龍圖閣直學士知秦州至和二年召兼侍讀拜御史中丞指陳時事無所曲避帝謂曰卿孤立乃能如是對曰臣仰託聖主致位侍從是為不孤今陛下之臣持祿養望者多而赤心謀國者少竊以為陛下乃孤立爾帝為之感動嘉祐三年擢樞密副使遷參知政事樞密使與韓琦同決建儲之策英宗立請老帝不許昇請不

已始賜告令養疾遂以彰信軍節度使同中書門下  
平章事鎮河陽三城拜太子太師致仕居嵩山之紫

虛谷薨年八十六贈司徒兼侍中謚康節

野史載張公昇作樞

相之後退歸陽翟生計不豐短氈輕條脩然自適  
乃結菴於嵩陽紫虛谷每旦晨起焚香讀華嚴卷  
中無長物荻簾紙帳布被革履而已年八十餘自  
撰滿江紅一首聞者莫不慕其曠達詞曰無利無  
名無榮無辱無煩無惱夜燈前獨歌獨酌獨吟獨  
笑况值群山初雪滿又明月交光好便假饒百歲  
擬如何從他老知富貴誰能保知功業何時了算  
儻飄金玉所爭多少一瞬光陰何足道但思行樂  
常不早待春來携  
酒殢東風眠芳草

劉几

劉几字伯壽河南洛陽人祖溫叟御史中丞父燁龍  
圖閣直學士俱有聲几以父仕為將作監主簿生而  
豪儁長折節讀書第進士從范仲淹辟通判邠州鑿  
五池以利民薦知寧州加東路鈐轄知邠州儂智高  
犯嶺南几佐狄青有戰功進皇城使知涇州遷西上  
閣門使以薦授大原涇原路總管夏人入寇几因索  
援兵與轉運使陳述古有隙改鄜州名判三班院尋  
為秦鳳總管神宗即位轉四方館使知保州治狀為  
河北第一踰六年即請老還為祕書監致仕至元豐

三年祀明堂大臣言几知音自山中詔几定太常雅  
樂樂成予一子官几得謝二十年放曠嵩少間遇唐  
末異人靖長官者得養生訣故益老不衰再加通議  
大夫元祐初無疾而卒年八十一

予備閱野史多載  
劉伯壽事稱父燁

尹京時每旦父趨郡必隨馬而出簿佐偵伺之輒  
先父入自課書史從容無缺一旦蚤至白塔樓遇  
一老人熟視伯壽曰少年人清氣足可以致神仙  
然肩骨低一指猶位躋三品文武雙全乃授以丹  
術後伯壽致仕築室嵩山下有二妾名萱草芳草  
皆秀麗而善音律伯壽出入乘牛吹鐵笛二草以  
蘄笛和之聲滿山谷牛行即行牛止即止其行也  
必命壺觴盡醉而歸嵩人謂為地仙元豐二年張  
舜民自蒲中來訪伯壽是時年七十四尚登峻極  
行步如飛舜民時與登封令龐元常與杜子春皆

奔喘不及伯壽頤而笑曰三年少乃爾耶袒露髀  
股示人皆肉皮累骨毛長數寸扣之有聲光彩爛  
然足未歇歌所為大曲路數千言響振山谷累夕  
對榻竟旦不眠也伯壽平生凡登高頂七十四次  
回則於峻極中院  
援筆紀歲月云

### 董五經

董五經隱嵩山程子聞其名謂亦窮經之士特往造  
焉董平日未嘗出是日不值還至途中遇一老人負  
茶果以歸且曰君非程先生乎程子異之曰先生欲  
來信息甚大某特入城置少茶果將以奉待也程子  
以其意誠同至其室語甚款亦無大過人者但久不

與物接心靜而明耳

晁說之

晁說之字以道鉅野人崇寧間與陳叔易同隱嵩山叔易赴召以道為詩嘲之云處士何人為作牙盡携猿鶴到京華故山巖壑應惆悵六六峰前只一家後亦徵為郡

金

張行信

張行信字信甫先名行忠登大定三十八年進士崇

慶二年為左諫議大夫宣宗立行信疏請立太子更  
累諫時政悉嘉納之遷山東按察使兼轉運使仍權  
本路宣撫副使將行奏去相臣之不忠者三年改安  
武軍節度使兼冀州管内觀察使始至即上書言四  
事朝廷多用其議召入歷吏戶禮三部尚書兼同修  
國史四年為太子少保酌定禮制定興元年拜參知  
政事可否時政不避權姦二年出為彰化軍節度使  
兼涇州管内觀察使去未久上諭宰臣曰自張行信  
降出卿等遂緘默耶行信始至涇即上書陳軍政多

見採納元光元年致仕哀宗立起為尚書左丞尋復  
致事居嵩山正大八年薨於崇福宮年六十九初遊  
嵩山時嘗曰吾意欲主此山果終於此

馮璧

馮璧字叔獻真定縣人幼穎悟不凡弱冠補大學生  
承安二年舉進士歷官鄜州錄事五年以功自東阿  
丞召入歷官太學博士至寧初去官宣宗南遷宰相  
奏復前職貞祐間遷翰林修撰為監察御史改大理  
寺丞禮部員外郎權右司諫上時務當先者六事四



年遷刑部郎中歷官守正持法不避患難出為歸德  
治中歷改集慶軍節度使上章乞骸骨進一官致仕  
元光正大時居高山龍潭寺數年每同元好問裕之  
雷淵希顏遊歷嵩少與汴禪師往來詩篇甚多天興  
元年河南破北歸又數年卒年七十九

杜時昇

杜時昇字進之霸州信安人博學知天文不肯仕進  
承安泰和間宰相數薦時昇可大用時昇謂所親曰  
吾觀正北赤氣如血東西亘天天下當大亂亂而南

北當合爲一消息盈虛循環無端察往考來孰能  
之是時風俗侈靡紀綱大壞世宗之業遂衰時昇乃  
南渡河隱居嵩少山中從學者甚衆大抵以伊洛之  
學教人自時昇始正大末卒

### 雷淵

雷淵字希顏應州渾源人父思仕至轉運使淵庶出  
最幼諸兄不齒父歿不能安於家乃發憤入太學從  
李之純遊遂知名登至寧元年進士調涇州錄事改  
東平河朔重兵所在驕將悍卒倚外敵爲重自行臺

以下皆摩撫之淵出入軍中偃然不為屈不數月間  
巷間多畫淵像雖大將不敢以新進書生遇之尋遷  
東阿令轉徐州觀察判官興定末召為應奉翰林文  
字拜監察御史言五事稱旨又彈劾不避權貴出巡  
郡邑所至有威譽奸豪不法者立箠殺之尋為人所  
訟罷去久之用宰相侯摯薦起為太學博士遷翰林  
修撰一夕暴卒年四十八淵為人軀幹雄偉髯張口  
哆顏渥丹眼如望洋遇不平則疾惡之氣見於顏面  
為文章詩喜新奇善結交凡當塗貴要與布衣名士

無不往來居京師賓客踵門未嘗去舍家無餘貲及待賓客甚豐腆莅官喜立名節見稱於時當罷御史時寓居崧山數載與元好問最善探幽履勝唱和甚多山中之人稱為元雷云

### 元好問

元好問字裕之太原秀容人元德明之子也七歲能詩年十四從陵川郝晉卿學不事舉業淹貫經傳百家六年而業成下太行渡大河與雷淵久居高少為箕山琴臺等詩禮部趙秉文見之以為近代無此作

也於是名震京師中興定五年進士第歷內鄉令正大中為南陽令天興初屢轉行尚書省左司員外郎金亡不仕為文有繩尺其詩奇崛而絕雕剝巧縵而謝綺麗諸體咸備蔚為一代詞宗晚年尤以著作自任欲作金史求金國實錄於順天張萬戶家弗得乃采撫所聞凡金之君臣遺言往行細為紀錄至百餘萬言名曰野史後纂金史者多本其所著云卒年六十八歲其所著述甚富名不具載

高仲振

高仲振字正之遼東人其兄領開封鎮兵仲振依之以居既而以家業付其兄挈妻子入嵩山博極群書尤淡易皇極經世學安貧自樂不入城市山野小人亦知敬之嘗與其弟子張潛王汝梅行山谷間人望之翩然如仙或曰仲振嘗遇異人教以養生術嘗終日燕坐骨節戛戛有聲所談皆世外事有扣之者輒不復語云

張潛

張潛字仲升武清人幼有志節慕荆軻聶政爲人年

三十始折節讀書時人高其行誼目曰張古人後客  
嵩山從高仲振受易年五十始娶魯山孫氏亦有賢  
行夫婦相敬如賓負薪拾穗行歌自得不知其貧也  
鄰里有為潛種瓜者及熟讓潛潛弗許竟分而食之  
嘗行道中拾一斧夫婦計度移時乃持歸訪其主還  
之里有兄弟分財者其弟曰我家如此獨不畏張先  
生知耶遂如初天興間潛挈家避兵少室乃不食七  
日死孫氏亦投絕澗死焉

元

杜瑛

杜瑛字文玉父時昇有傳瑛長七尺美鬚髯氣象魁  
偉金將亡避地緱氏山中時兵後文物凋喪瑛搜訪  
諸書盡讀之讀輒不忘而究其指趣古今得失如指  
諸掌間闢轉徙教授汾晉間中書粘合珪開府為相  
瑛赴其聘遂家焉與良田千畝辭不受歲己未世祖  
南伐至相召見問計瑛從容陳對帝悅曰儒者中乃  
有此人乎瑛復勸帝數事帝納之心賢瑛謂可大用  
命從行以疾弗果中統初詔徵瑛時王文統方用事



辭不就左丞張文謙宣撫河北奏為懷孟彰德大名  
等路提舉學校官又遺執政書以辭之或勉之仕則  
曰後世去古雖遠而先王之所設施本末先後猶可  
考見故為政者莫先於復古苟因習舊弊以求合乎  
先王之意不亦難乎吾又不能隨時俛仰以赴機會  
將焉用仕於是杜門著書一不以窮通得喪動其志  
優游道藝以終其身年七十遺命其子處立處愿曰  
吾即死當表吾墓曰緱山杜處士天曆中贈資德大  
夫翰林學士上護軍追封魏郡公謚文獻

李俊民

李俊民字用章澤州人讀書有大志得河南程氏之學承安中舉進士第一應奉翰林文字未幾棄官隱於高山自號鶴鳴子嘗遇荆隱士授以邵子皇極數劉秉忠自以為不可及薦之世祖召對大悅欲官之懇辭尋乞還山卒謚莊靜先生

白居易

白居易字行簡世孫人早喪母隨父寓忻州甫六歲性穎悟從庸齋楊來叔學家素貧織履事父孝聞鄉

里及冠群經諸子無不精究至元壬辰歲值薦饑挈家南來寓於嵩少間買田築室自號嵩溪先生遂定居焉著書傳道四方受業之徒雲集甘守一貧儲無擔石宴如也後以壽終於嵩下

夫明

### 何靜業

何靜業自號野鶴子嘗隱嵩山巖穴處壘石為居分守參政李公民質知其人檄縣代為結廬於甘露臺之側廬成靜業棲旬日輒空其室以去徧遊名山或

間一二歲輒復一來予始至物色之不可得一日予齋宿嶽宮忽投刺來見自稱散人何靜業年約六十許與之談頗悉玄理而飾以儒者之緒論雍容閒雅亦似有道者扣其邑里家世俱不對今亦不知其所之

二室名勝古來隱遯之士以爲淵藪惜予齋中書少錄止於此其他卓絕流品泯沒無聞者不知凡幾矣人固有幸不幸哉然至人入山惟恐不深入林惟恐不密當世猶畏人知豈肯身後乃與鬼爭

名乎若唐郭仙舟金李若愚輩雖僅存姓名而不  
詳其事亦無所恨耳惟是本朝道化休明賢哲挺  
出紳冕偉人後先輝映獨所稱山林之士實鮮嘉  
遜焉六十諸峰當寂寂笑人矣彼結靽曳裾日挾  
貴人竿牘為市者入嵩辱嵩安得倒天漢之水為  
嶽神洗垢乎

門人

魏三槐  
張孔修校字

嵩書卷之七終